

Dagangan borong, runcit catat jualan tertinggi

Perdagangan borong dan runcit Malaysia mencatatkan nilai jualan bulanan tertinggi berjumlah RM137.3 bilion pada Disember 2022, dengan suku keempat tahun lalu mencatatkan RM405.2 bilion.

Bagi keseluruhan 2022, jumlah jualan mencecah RM1.6 trilion, demikian menurut laporan Jabatan Perangkaan Malaysia (DOSM) dalam siaran *Prestasi Perdagangan Borong & Runcit, Disember 2022* yang diterbitkan semalam.

Ketua Perangkawan Malaysia, Datuk Seri Dr Mohd Uzir Mahidin, berkata peningkatan 13.8 peratus bagi perdagangan borong dan runcit pada Disember 2022 berbanding bulan yang sama tahun sebelumnya disumbangkan oleh subsektor perdagangan runcit yang mencatatkan peningkatan RM11 bilion atau 22.7 peratus kepada RM59.5 bilion.

Beliau berkata, kenderaan bermotor juga berkembang dengan 20.3 peratus atau RM3 bilion kepada RM17.5 bilion.

"Dalam tempoh sama, perdagangan borong meningkat 4.7 peratus atau RM2.7 bilion kepada RM60.3 bilion.

"Bagi perbandingan bulan ke bulan, nilai jualan perdagangan borong dan runcit meningkat 2.3 peratus, peningkatan RM3 bilion, disokong terutama kenderaan bermotor yang meningkat 9.3 peratus," katanya.